



Ordinaziun davart la calculaziun da las notas finalas al gimnasi ed a la scola media spezialisada en vista a la pandemia dal coronavirus (O COVID-19 gim ed SMS)

Dals 07-05-2020

Relaschs tangads da questa fatschenta (numers dal DG)

Nov: –
Midà: –
Abolì: –

Sa basond sin l'art. 1 al. 3 da l'Ordinaziun davart la realisaziun dals examens chantunals da maturitad gimnasiala 2020 en vista a la pandemia dal coronavirus (Ordinaziun davart COVID-19 examens da maturitad gimnasiala)^[1] sco er sin l'art. 45 al. 1 da la Constituziun chantunala^[2]

relaschada da la Regenza ils 7 da matg 2020

I.

1. Chaussas generalas

Art. 1 Intent

¹ Questa ordinaziun regla – en vista a la pandemia dal coronavirus – la calculaziun da las notas finalas per l'onn da scola 2019/20 als gimnasis ed a las scolas medias spezialisads en divergenza da las suandantas ordinaziuns:

- a) Ordinaziun davart il gimnasi (OGim)^[3];
- b) Ordinaziun davart la scola media spezialisada (OSMS)^[4].

² Las disposiziuns valan en cumplettaziun dal conclus da la Regenza dals 30 d'avrigl 2020 (prot. nr. 372) e preciseschon l'execuziun dal dretg surordinà, en spezial da l'Ordinaziun dal Cussegl federal davart la realisaziun dals examens chantunals da maturitad gimnasiala 2020 en vista a la pandemia dal coronavirus (Ordinaziun davart COVID-19 examens da maturitad gimnasiala)^[51] e da las Directivas COVID SMS 2020: Proceduras da qualificaziun adattadas per ils diploms da las scolas medias spezialisadas pervia dal coronavirus (COVID-19) l'onn 2020 da la Conferenza svizra da las directuras e dals directurs chantunals da l'educaziun publica (CDEP).

2. Gimnasi

Art. 2 Notas dals examens da maturitad

¹ Ils examens da maturitad en scrit vegnan validads cun quartas notas, cun mesas notas e cun notas entiras.

² En ils roms d'examen en scrit emprima lingua, segunda lingua naziunala, matematica sco er en il rom d'accent ed en il rom complementar vegnan las notas da l'attestat dal 2. semester da l'onn da scola 2019/20 er resguardadas per calcular las notas dals examens da maturitad.

³ La nota dals examens da maturitad sa cumpona per mintga rom examinà en scrit mintgamai per la mesadad da la prestaziun a l'examen da maturitad en scrit e da la nota da l'attestat dal 2. semester da l'onn da scola 2019/20.

Art. 3 Notas da maturitad

¹ Las notas da maturitad vegnan dadas tenor las disposiziuns da la ORM/dal RRM mintgamai per la mesadad sin basa da las notas da l'attestat dal 1. semester da l'onn da scola 2019/20 e da las notas dals examens da maturitad tenor l'artitgel 2 alinea 3 da questa ordinaziun.

² En ils roms da maturitad, che na vegnan betg examinads en scrit, vegn la nota da maturitad calculada sin basa da las notas da l'attestat dal 1. e dal 2. semester da l'onn da scola 2019/20; en quest connex quintan las notas da l'attestat dal 1. semester duas giadas.

³ Per ils roms da maturitad ch'èn vegnids terminads avant l'onn da scola 2019/20, vegnan surpigliadas las notas da maturitad ch'èn vegnidas eruidas tenor las disposiziuns da l'Ordinaziun davart il gimnasi.

3. Scola media spezialisada

Art. 4 Notas dals examens finals

¹ Ils examens finals en scrit vegnan validads cun mesas notas e cun notas entiras.

² En ils roms d'examen en scrit vegnan las notas da l'attestat dal 2. semester da l'onn da scola 2019/20 er resguardadas per calcular las notas dals examens finals.

³ La nota da l'examen final sa cumpona per mintga rom examinà en scrit mintgamai per la mesadad da la prestaziun a l'examen final en scrit e da la nota da l'attestat dal 2. semester da l'onn da scola 2019/20.

Art. 5 Notas dal rom per il certificat da scola media spezialisada

¹ Las notas dal rom per il certificat da scola media spezialisada vegnan dadas tenor las disposiziuns da la Conferenza svizra da las directuras e dals directurs chantunals da l'educaziun publica (CDEP).

² En ils roms, en ils quals ha lieu in examen final en scrit, vegnan las notas dal rom per il certificat da scola media spezialisada calculadas mintgamai per la mesadad sin basa da las notas da l'attestat dal 1. semester da l'onn da scola 2019/20 e sin basa da las notas dals examens finals tenor l'artitgel 4 alinea 3 da questa ordinaziun.

³ En ils ulteriurs roms vegnan las notas dal rom per il certificat da scola media spezialisada calculadas sin basa da las notas da l'attestat dal 1. e dal 2. semester da l'onn da scola 2019/20; en quest connex quintan las notas da l'attestat dal 1. semester duas giadas.

⁴ Per ils roms ch'èn vegnids terminads avant l'onn da scola 2019/20, vegnan surpigliadas las notas da maturitad ch'èn vegnidas eruidas tenor las disposiziuns da l'Ordinaziun davart la scola media spezialisada.

II.

Naginas midadas en auters relaschs.

III.

Naginas aboliziuns d'auters relaschs.

IV.

Questa ordinaziun entra en vigur il di da sia publicaziun en la Collecziun uffiziala da leschas e vala fin ils 31 d'october 2020.

-
- [1] CS [413.16](#)
 - [2] DG [110.100](#)
 - [3] DG [425.050](#)
 - [4] DG [425.140](#)
 - [5] CS [413.16](#)